



საქართველოს გაერთიანებული სახელმწიფოს და სოფლის მეურნეობის მინისტრი

ბრძანება N 2-114

06/02/2020

ქ. თბილისი

სიღნაღის მუნიციპალიტეტში, სოფ. ბოდბეს მიმდებარე ტერიტორიაზე სასარგებლო წიაღისეულის (გამარმარილოებული კირქვა) მოპოვებაზე სკრინინგის გადაწყვეტილების შესახებ

სსიპ წიაღის ეროვნული სააგენტოს მიერ გზშ-ის ჩატარების საჭიროების დადგენის მიზნით საქართველოს გარემოს დაცვისა და სოფლის მეურნეობის სამინისტროში წარმოდგენილია სიღნაღის მუნიციპალიტეტში სოფ. ბოდბეს მიმდებარე ტერიტორიაზე 260400 მ³ სასარგებლო წიაღისეულის (გამარმარილოებული კირქვა) მოპოვების სკრინინგის განცხადება.

წარმოდგენილი დოკუმენტაციის თანახმად, ორ უბნად წარმოდგენილი სალიცენზიო ობიექტი მდებარეობს ზღვის დონიდან 600-650 მეტის სიმაღლეზე, სიღნაღის მუნიციპალიტეტში, სოფ. ბოდბეს მიმდებარე ტერიტორიაზე. ტერიტორია მიეკუთვნება კახეთის დაბალმთიან ზონას. აღნიშნული ტერიტორია წარმოადგენს სახელმწიფო საკუთრებას. ობიექტიდან უახლოესი დასახლებული პუნქტია სოფ. კაზლარი (საგარეჯოს რაიონი), რომელიც საპროექტო ტერიტორიიდან დაახლოებით 18 კმ-ში მდებარეობს. საპროექტო ტერიტორიიდან დაახლოებით 6 კმ-ში მდებარეობს ივრის ალკვეთილი, ხოლო, 2 კმ-ში საქართველოს სახელმწიფო საზღვარი.

წარმოდგენილი განცხადების მიხედვით, ტერიტორია აგებულია ქვედა და შუა სარმატის ნაცრისფერი წვრილმარცვლოვანი ქვიშაქვებით, ყავისფერი თიხების შუაშრეებით და ორგანოგენული კირქვების იშვიათი შუაშრეებით.

საინჟინრო-გეოლოგიური პირობების სირთულის მიხედვით, წიაღისეულის მოპოვების ობიექტის ტერიტორია მიეკუთვნება II (საშუალო სირთულის) კატეგორიას. სალიცენზიო ობიექტის ფართობია: I უბანი 143150 მ² და II უბანი 20810 მ², ჯამში 163960 მ². დამუშავების ჰორიზონტად მიღებულია 600 მ. წიაღისეულის მოპოვების ობიექტის დამუშავება მოხდება ღია კარიერული წესით.

წიაღისეულის საბადო დაძიებულია დეტალურად და მისი რაოდენობრივი მაჩვენებლები მარაგების და პროგნოზული რესურსების კატეგორიების მიხედვით წარმოდგენილია A (72 ათ. მ³); B (92 ათ. მ³); C (96.4 ათ. მ³) კატეგორიებით და ჯამში შეადგენს 260400 მ³ -ს. ობიექტიდან მოპოვებული გამარმარილოებული კირქვა გამოიყენება როგორც

მოსაპირკეთებელი ფილების წარმოებაში, ასევე რეკომენდირებულია შიდა სამუშაოებისათვის.

სკრინინგის განცხადების მიხედვით, სალიცენზიო ობიექტი არ ხვდება სახელმწიფო ტყის ფონდის, კულტურული მემკვიდრეობის ძეგლების სიახლოვეს, არც ტყით მჭიდროდ დაფარულ ტერიტორიაზე, სადაც გაბატონებულია საქართველოს „წითელი ნუსხით“ დაცული ხე-მცენარეები. აღსანიშნავია, რომ ობიექტი ემთხვევა ივრის ზეგანის ფრინველთათვის მნიშვნელოვან ტერიტორიას (IBA-ივრის ზეგანი).

წარმოდგენილი დოკუმენტაციის მიხედვით, კირქვების ზედაპირზე გამოსავალი გამოიშვლებულია დანარჩენი ტერიტორია კი დაფარულია საშუალო სიმძლავრის ნიადაგით. ობიექტის დამუშავების დროს მოხსნილი ნიადაგის ფენა და ფუჭი ქანები დასაწყობდება და გამოყენებული იქნება ტერიტორიის რეკულტივაციისთვის.

სკრინინგის განცხადებაში ასახული რეკომენდაციების თანახმად, ობიექტის დამუშავება უნდა განხორციელდეს მაღალი ჰიფსომეტრიული ნიშნულიდან დაბლისკენ, საქართველოში მოქმედი სამთო საქმისადმი მიღებული წესებისა და ნორმების დაცვით. ობიექტის დამუშავებამ შესაძლოა გამოიწვიოს არსებული გეოდინამიკური სიტუაციის გაუარესება, რაც საჭიროებს დამატებით შეფასებას.

პროექტის განხორციელება დაკავშირებულია საკმაოდ დიდ მასშტაბზე (დაახლოებით 16 ჰა.) ახალი ტერიტორიის ათვისებასთან, რაც თავის მხრივ გამოიწვევს მნიშვნელოვან ზემოქმედებას გარემოს სხვადასხვა კომპონენტებზე.

ღია კარიერული წესით დამუშავებისას მოსალოდნელია ატმოსფერული ჰაერის დაბინძურება და ატმოსფერულ ჰაერში მავნე ნივთიერებების გაფრქვევა. საქმიანობის სპეციფიკიდან გამომდინარე, სალიცენზიო ობიექტის დამუშავების დროს მოსალოდნელია ხმაურის წარმოქმნა და გავრცელება, რამაც შესაძლებელია უარყოფითი გავლენა მოახდინოს გარემოზე. გარდა ამისა, მოპოვებით სამუშაოებს თან ახლავს ვიბრაცია, სხვადასხვა დანადგარების მუშაობისას. წარმოდგენილი დოკუმენტაციიდან არ ჩანს წიაღისეულის მოპოვების კონკრეტული მეთოდი (მაგალითად, განხორციელდება თუ არა ბურღვა-აფეთქებითი სამუშაოები), მოპოვების ხანგრძლივობა, ინფორმაცია საქმიანობის პროცესში წარმოქმნილი ნარჩენების შესახებ, ასევე, საქმიანობის შედეგად გამოწვეული შესაძლო რისკებისა და საფრთხეების წარმოქმნის საკითხი, რაც სალიცენზიო ფართობის გათვალისწინებით მოითხოვს დამატებით შესწავლას.

განცხადებაში არ არის წარმოდგენილი ინფორმაცია თუ რა სახის ზემოქმედება შეიძლება მოახდინოს აღნიშნულმა საქმიანობამ ბიომრავალფეროვნებაზე და საპროექტო ტერიტორიის სიახლოვეს არსებულ ჰაბიტატებზე. როგორც უკვე აღინიშნა, ობიექტი ხვდება ფრინველთათვის მნიშვნელოვანი ტერიტორიის ფარგლებში.

ობიექტის დამუშავებისას წარმოქმნილი ფუჭი ქანების დიდი რაოდენობიდან გამომდინარე, მათი განთავსების მიზნით, საჭირო იქნება ახალი ტერიტორიების ათვისება და სანაყაროებისთვის შესაბამისი პროექტის შემუშავება. ამასთან დიდი რაოდენობით მოსახსნელი ნიადაგის საფარის და ფუჭი ქანების დასაწყობება/რეკულტივაცია მოითხოვს რეკულტივაციის დეტალური პროექტის შემუშავებას 2013 წლის 31 დეკემბრის N424 დადგენილების შესაბამისად.

„გარემოსდაცვითი შეფასების კოდექსის“ მე-7 მუხლის მე-5 ნაწილის შესაბამისად, სკრინინგის განცხადება განთავსდა სამინისტროს ოფიციალურ ვებგვერდზე და სიღნაღის მუნიციპალიტეტის მერიის საინფორმაციო დაფაზე. საზოგადოების მხრიდან აღნიშნულ საქმიანობასთან დაკავშირებით წერილობითი შენიშვნები და მოსაზრებები არ ყოფილა წარმოდგენილი.

სკრინინგის განცხადების მიხედვით დგინდება, რომ სიღნაღის მუნიციპალიტეტში, სოფ. ბოდბეს მიმდებარე ტერიტორიაზე გამარმარილოებული კირქვის მოპოვება თავისი მასშტაბით და მოპოვების მეთოდით (ღია კარიერული წესით) გამოწვევს მნიშვნელოვან ზემოქმედებას გარემოზე.

ზემოაღნიშნული კრიტერიუმების გათვალისწინებით, „გარემოსდაცვითი შეფასების კოდექსი“-ს მე-7 მუხლის მე-6 ნაწილის და ამავე კოდექსის II დანართის მე-2 პუნქტის 2.1-ე ქვეპუნქტის საფუძველზე,

ვ ბ რ ძ ა ნ ე ბ:

1. მიღებულ იქნეს სკრინინგის გადაწყვეტილება, რომ სიღნაღის მუნიციპალიტეტში, სოფ. ბოდბეს მიმდებარე ტერიტორიაზე სასარგებლო წიაღისეულის (გამარმარილოებული კირქვა) მოპოვება **დაექვემდებაროს** გარემოზე ზემოქმედების შეფასებას;
2. ლიცენზიის მფლობელი ვალდებულია საქართველოს კანონის „გარემოსდაცვითი შეფასების კოდექსის“ მე-8 მუხლის შესაბამისად უზრუნველყოს სკოპინგის პროცედურის გავლა;
3. ბრძანება დაუყოვნებლივ გაეგზავნოს სსიპ „წიაღის ეროვნულ სააგენტოს“;
4. ბრძანება ძალაში შევიდეს სსიპ „წიაღის ეროვნული სააგენტოს“ მიერ ამ ბრძანების გაცნობისთანავე;
5. სკრინინგის გადაწყვეტილების გაცემიდან 5 დღის ვადაში აღნიშნული გადაწყვეტილება განთავსდეს სამინისტროს ოფიციალურ ვებგვერდზე და სიღნაღის მუნიციპალიტეტის აღმასრულებელი ან/და წარმომადგენლობითი ორგანოს საინფორმაციო დაფაზე;
6. ბრძანება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (თბილისი, დ. აღმაშენებლის ხეივანი, მე-12 კმ. N6) მხარის მიერ მისი ოფიციალური წესით გაცნობის დღიდან ერთი თვის ვადაში.

ლევან დავითაშვილი



მინისტრი